



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**25 Janeiro 2023**

**JSMP asina MoU ho Estrutura Suku Uma Ana-Ulu ba Programa Apoiu  
Seguransa Komunitáriu (PASK)**

Iha 13 Janeiro 2023, JSMP hamutuk ho Lideransa Suku Uma Ana-Ulu, Postu Administrativu Venilale, Munisípiu Baukau representa husi Xefi Suku Uma Ana-Ulu, asina Memorandu ba Intendimentu (*MoU*) kona-ba JSMP nia programa Apoiu Seguransa Komunitáriu (PASK) ho atividade espesífiku mak monitoriza prosesu rezolve disputa sira ho sistema justisa komunitáriu iha Suku Uma Ana-Ulu. Alende ne'e, aseguara harmonizasaun entre justisa komunitáriu ho justisa formál.

MoU ne'e vigór hahú husi 13 Janeiro 2023 to'o 10 Janeiro 2024 no ho possibilidade sei hanaruk tan depende ba konkordánsia husi parte rua.

“Agradese ba xefe suku ho estrutura tomak ba disponibilidade serbisu hamutuk ho JSMP iha futuru atu fasilita no hadi'ak liután sistema justisa komunitáriu ne'ebé durante ne'e eziste ona. Alende ne'e, aseguara informasaun ba comunidade kona-ba andamentu prosesu sira ne'ebé lori ba iha justisa formal no iha tempu hanesan hasa'e mós koñesimentu lideransa suku sira kona-ba lei aplikável,” dehan Sra. Ana Paula Marçal, Diretora Ezekutivu JSMP.

Señor Octavio de S. Belo hanesan representante Administradór Postu Administrativu Venilale, hateten katak nia parte sente kontente tanba JSMP bele hili Suku Uma Ana-Ulu sai hanesan suku tarjeitu hodi hadi'ak prosesu judisiáriu nian no prontu atu kolabora iha prosesu ida ne'e, nune'e husu ba estrutura suku atu bele kolabora didi'ak ho JSMP. Representante administradór ne'e husu mós ba JSMP atu bele haluan tan programa ne'e ba iha suku sira seluk ne'ebé hasoru mós dezafiu hanesan.

Entretantu Juisa Administradora Tribunál Judisiál Primeira Instánsia Baukau, Meritísima Dra. Jumiaty Maria Freitas iha ninia intervensaun agradese tebes ba JSMP ba iha iniciativa hodi kria programa ne'e tanba konsidera katak bainhira programa ne'e implementa ho di'ak bele tulun hodi hamenus tribunál nia serbisu tanba kazu balun la presiza ona to'o iha tribunál. Sa tan tribunál iha limitasaun rekursu umanus no agora dadaun mós laiha julgamentu movél. Ho nune'e, juisa husu ba estrutura suku no mós comunidade Uma Ana-Ulu atu kolabora no aproveita didi'ak oportunidade ida ne'e. Mezmu nune'e, juisa ne'e husu ba autoridade suku sira atu tenke tesi-lia ho justu liuliu

Rua Beco Lakateu, Aldeia Manufuik, Suku Kolmera,  
Sub-distritu Vera Cruz Munisípiu Dili

PoBox: 275

Telefone: 3323883 |77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

liga ho indemnizasaun ba vítima sira ne'ebé dala barak nota katak indemnizasaun sira iha justisa komunitáriu la fó ba vítima maibé ba fali família vítima nian.

Parte seluk representante Defensoria Públiku, Dr. Sidonio M. Sarmiento hateten katak JSMP nia programa ne'e importante duni tanba bele ajuda defensoria nia serbisu iha parte dezaminasaun informasaun kona-ba defensoria nia papêl no oinsa comunidade bele asesu ba justisa.

Enkuantu Sr. Marcos de S. Soares hanesan representante Komandante Eskuadra Postu Venilale hateten katak antes regra tara-bandu kria iha Suku Uma Ana-Ulu, comunidade dala barak lori sira nia problema ba iha polísia maibé depoisde iha 2012 bainhira iha ona regra tara-bandu comunidade ladún ba ona tribunál tanba dala barak kazu sira rezolve deit iha nivel estrutura suku. Tanba ne'e, komandande ho nia ekipa prontu atu kolabora hodi hadia sistema sira ne'e.

Seremonia asina MoU ne'e partisipa husi Sr. Octavio de s. Belo representante Administradór Postu Administrativu Venilale, Munisípiu Baukau, Dr. Sidonio M. Sarmiento, representante Defensoria Publika, Sr. Marcos de S. Soares, Komandante PNTL Eskuadra Postu Venilale, Sra. Hildegardis Wondeng, Representante Programa PASK/TAF no mós akompaña husi xefi aldeia, lia-nain, representante KPK, makleha, maksawar no delegada feto ho mane husi Suku Uma Ana-Ulu.

Iha atividade ida ne'e, JSMP serbisu hamutuk ho The Asia Foundation liuhusi Programa Apoiu Seguransa Komunitariu (PASK) ne'ebé finansia husi Embaxada Nova Zelandia hodi halo peskiza kona-ba oinsá efeito husi justisa komunitáriu ba rezolve disputa sira iha comunidade.

Husi programa ne'e JSMP hasoru ona Lideransa Suku inklui ho estrutura sira no lia nain sira iha suku hamutuk 9 iha Munisípiu lima (5) nia laran mak hanesan Baukau, Covalima, Ermera, Aileu no RAEOA. Iha ikus husi programa ida ne'e JSMP ho The Asia Foundation konklui ho opsau hodi halo monitorizasaun ba Suku hat (4) hanesan Suku Samalete, Postu Administrativu Railako, Munisípiu Ermera, Suku Oges, Postu Administrativu Maucatar, Munisípiu Covalima, Suku Lifau, Postu Administrativu Pante Makasar, RAEOA, Suku Uma Ana-Ulu, Postu Administrativu Venilale, Munisípiu Baukau.

**Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>